


續名醫類案

第三十四



續名醫類案卷三十四

錢塘魏之琇編集

漢院呂大綱慎齋
海昌王士雄孟英

同校

時毒

此症感四時邪毒之氣其後發于鼻面耳項咽喉赤腫無頭或結核有根寒熱頭痛狀如傷寒此乃時行淫毒之氣發於頭面所謂大頭瘟也以其能作膿出毒故入外科

少宰李蒲汀患時毒用發散之藥耗損元氣患處不消體倦

惡寒食少口乾用益氣湯加桔梗及托裡消毒散而愈

秋官陳同野患時毒元氣素弱脈微細而伏此形病俱虛也

用參朮芎歸陳皮柴胡升麻炙草以升舉陽氣用牛蒡元



南京中医药大学图书馆藏

參連翹桔梗以解熱毒二劑腫頓消而脈亦復矣苟以脈微細爲屬陰以腫赤爲屬陽而藥之鮮有不誤者

一婦人時毒潰後腫赤不消食少體倦膿清色白乃脾肺氣虛也先用六君加桔梗芎歸後用益氣湯加桔梗而斂

春官袁谷虛之妹患時毒表散過度腫硬不痛脈浮大按之而短此真氣絕也辭不治後果歿

一男子患此症腫痛發熱作渴脈實便秘以五利大黃湯下之諸症悉退以葛根牛蒡子湯四劑而痊

一男子患此症表裡俱解腫痛尙不退以葛根升麻湯二劑而腫消

一男子患此症腫痛發寒熱脈浮數以荆防敗毒散二劑少愈以人參敗毒散二劑勢減半又二劑而痊

一男子患此症耳面赤腫作痛咽乾發熱脈浮數先以荆防敗毒散二劑勢退大半以葛根牛蒡子湯四劑而痊

一婦人患此症表邪已解腫尙不消診之數脈滑而數乃瘀血欲作膿也以托裡消毒散潰之而愈

一男子患此症焮腫脹痛作渴煩熱便秘脈數按之尤實用防風通聖散一劑諸症頓退以荆防敗毒散加元參牛蒡黃芩二劑而痊

一老人冬月頭面耳項俱腫痛甚便秘脈實此表裡俱實病



也飲防風通聖散不應遂砭患處出黑血仍投前藥卽應
又以荆防敗毒散而瘳蓋前藥不應者毒血凝聚上部經
絡藥力難達故也惡血既去其藥自效或拘用寒遠寒及
年高畏用硝黃而用托裡與夫尋常之劑或不砭泄其毒
專假藥力鮮不危矣徐靈胎曰通聖散乃治表裡俱熱之
方所謂兩解法也須審定內外俱熱
之症乃可消息施用又曰荆防敗毒
散爲時毒主方惟人參不宜輕用

一男子患此症表裡俱解惟腫不消以托裡消毒散四劑膿
成針之而愈

一婦人患此症腫痛用硝黃之劑攻之稍緩翼日復痛診之
外邪已退此瘀血復作膿也用托裡消毒散潰之而愈

一男子頭面腫痛服硝黃敗毒之劑愈甚診之脈浮數邪在表尙未解用荆防敗毒散二劑勢退大半更以葛根牛蒡子湯四劑而痊內經曰身半以上腫天之氣也身半以下腫地之氣也乃邪客心肺之間上攻頭目而爲腫此感四時不正之氣爲患與夫膏粱積熱之症不同硝黃之劑非大便秘實不可用若不審其因不辨其虛實表裡概用攻之必致有悞常見飢饉之際芻蕘之人多患之乃是胃氣有損邪氣從之爲患不可不察常治邪在表者用葛根牛蒡子湯人參敗毒散或普濟消毒飲子邪在裡者五利太黃湯梔子仁湯表裡俱不解者防風通聖散表裡俱解而

腫不退者犀角升麻湯如腫甚者砭患處出惡血以泄其毒。或用通氣散取嚏。以泄其毒。十日外自愈。若嚏出膿血即愈。欲其作膿者。用托裡消毒散。欲其收斂者。用托裡散。此法最爲穩當。五七日咽喉腫閉。言語不出。頭面不腫。食不知味者。不治。

此乃時行溼毒之氣發於頭面所謂大頭瘟也。以其能作膿出毒。故入外科。

一男子患此症。服表散藥。愈熾發熱。便祕診其脈沈實。此邪在裡也。以大黃湯下之。裡症悉退。以葛根牛蒡子湯浮腫亦消。惟赤腫尙存。更以托裡藥潰之而愈。齊氏云。時毒者爲四時邪毒之氣而感之於人也。其後發于鼻面耳項咽喉。赤腫無頭。或結核有根。令人增寒發熱。頭痛或肢體痛。

甚者恍惚不寔咽喉閉塞昧者將謂傷寒便服解藥一
日腫氣增益方悟始求瘍醫原夫此症古無方論世俗通
爲丹瘤病家惡言時毒切恐傳染考之于經曰人身忽經
變赤狀如塗丹謂之丹毒此風熱惡毒所爲與時毒特不
同耳蓋時毒初起狀如傷寒五七日間乃能殺人治者宜
精辨之先診其脈滑數浮洪沈緊弦澹皆其候蓋浮數者
邪氣在表也沈澹者邪氣深也氣實之人急服化毒丹以
攻之熱實不利大黃湯下之其有表症者解毒升麻湯以
發之或年高氣軟者五香連翹湯主之又於鼻內噓通氣
散取十餘嚏左右看病之人每日用噓藥嚏之則不傳染

其病人每日亦用噓藥三五次。以泄熱毒。此治時毒之良法也。經三四日不解者。不可大下。猶宜和解之。服犀角湯翹散之類。至七八日大小便不通利。頭面腫起高赤者。可服托裡散。黃芪散。宜鑱砭割出血。泄其毒氣。十日外不治自愈也。此病若五日以前精神昏亂。咽喉閉塞。語聲不出。頭不腫。食不知味者。必死。治之無功矣。然而此疾有陰有陽。有可汗。有可下。常見粗工。但云熱毒。就用寒涼。殊不知病有微甚。治有逆從。不可不審也。

徐考功年逾三十。耳面燉腫。寒熱拘急。脈浮洪。此時毒症也。邪在表。以荆防敗毒散。加牛蒡元參治之。漸愈。更以升麻

葛根連翹桔梗川芎銀花牛蒡而平復

疔

羅謙甫云丙午歲予居藁城人多患疔瘡縣尹董公謂予曰
今歲患疔瘡者極多貧民無力醫治近於史侯處得數方
用之者無不效官給藥錢君當捨手治之遂諾其語董公
榜示通衢命予施藥如此一年全活甚衆其用保生錠子
千金托裡散神聖膏藥破棺丹凡四方保生錠金脚信二
錢雄黃三錢輕粉二錢硃砂三錢麝香一錢半巴豆四十
九粒蟾酥一錢爲細末用黃蠟五錢溶開將藥和成錠子



冷水浸少時取出捏作餅子如錢眼大將瘡頭撥開每用

一餅次用神聖膏後用托裡散若瘡氣入腹危者服破棺

丹世傳疔瘡必有一條紅線可針紅線所至之處出毒血乃敷藥神聖膏藥當歸藁本各

半兩乳香沒藥各二錢白芨琥珀各二錢半黃丹二兩白

膠黃三兩黃蠟二兩粉霜一錢木鱉子五十個去皮巴豆

十五粒去油清油槐柳枝各百二十枝胆礬一錢先將槐

柳枝下在油內熬焦取出復下餘藥熬勿至焦濾出待油

澄清下黃丹再熬成膏用緋帛攤之立有神效托裡散一兩五錢芪

朮芎防各二兩桔芷翹二兩芍桂草參各一兩歸朮香乳香沒

藥各半兩細末每服三錢酒一大盞煎二三沸和渣溫服破

棺丹大黃二兩半生半熟甘草芒硝各一兩細末密丸彈子大每服半丸食後溫酒化下或童便半盞研化之忌冷水。

薛立齋治上林陳靜涵面患疔脈洪數有力屬邪氣蘊結用清熱消毒散二劑未應或用黃芪肉桂等藥二劑反益其勢致耳目唇口俱腫閉頭面如斗由邪氣外實也前脈按之無力由元氣內虛也連進托裡消毒之藥及數砭患處出黑血碗許已而膿與腐肉併潰而出復用托裡之藥瘡勢漸愈七日後復因調護失宜以致煩渴不食兩尺脈如絲欲絕急用八味丸料煎服其脈頓復手足自溫使非砭



以泄其外。托裡散以補其內。八味丸以回其陽。則治之失宜。必致不救。慎之慎之。

長洲庠蘇子忠鼻梁患疔。症屬表邪。但氣血俱虛。不勝發散。遂以補中益氣爲主。佐以防風白芷而愈。

張所望治理安寺一僧。患水疔走黃。絕水穀者已三日。衆莫能治。延所望入視。曰。毒已入內。奈何。須下一針方可。因向瘡頂刺入寸餘。始聞痛聲。曰。生矣。隨以膏塗之。復投丹藥數粒。拔其疔根。寸許堅黑如鐵。遂愈。

錢塘縣志

立齋治一男子。足患疔。作痒惡心。嘔吐時發。昏亂脈浮。數明。炙二十餘壯。始痛以奪命丹。一服腫起。更以荆防敗毒散。



而愈

一男子患疔發熱煩躁脈實以清涼飲下之而愈。

一男子胸患疔遍身麻木脈數而實急針出惡血更明灸數壯始痛服防風通聖散得利而愈。

一男子左手背患疔是日一臂麻木次日半體皆然神思昏潰遂明灸至二十餘壯尙不知痛又三十餘壯始不麻至百壯始痛以奪命丹一服腫始起更用神異膏及荆防敗毒散而愈。

一老婦足大指患疔甚痛令灸之彼不從專服敗毒藥致真氣虛而邪氣愈實竟至不救蓋敗毒散雖能表散瘡毒然



而感有表裡所發有輕重體段有上下所稟有虛實。豈可一概而用之耶。且至陰之下藥力之所難到。端假藥力。則緩不及事。不若灸之爲良。故下部患瘡。皆宜隔蒜灸之。痛則灸。至不痛。不痛則灸。至痛。若灸之而不痛者。宜明灸之。及針疔四畔去惡血。以奪命丹一粒入瘡頭孔內。仍以膏藥貼之。若針之不痛。或無血者。以針燒赤頻烙患處。以痛爲度。或不痛。眼黑如見火光者。此毒氣入臟腑。也不治。若患在手足。紅絲攻心腹者。就于絲盡處刺去惡血。宜服荆防敗毒散。若絲近心腹者。宜挑破瘡頭去惡水。亦以膏藥貼之。如麻木者。服奪命丹。如牙關緊急。或喉內患者。並宜

噲一二丸。凡人暴死多是疔毒。用燈照看遍身若有小瘡。卽是宜急灸之。俟醒更服敗毒藥。或奪命丹。人汗入肉食之。則生疔瘡。不可不慎。

劉禹錫纂柳州救三死方云。元和十一年得疔瘡。凡十四日。

益篤。善藥傳之。皆莫知長樂賈方伯教用蜚螬肉。一夕而

百苦皆已。明年正月食羊肉又大作。再用亦如神效。其法

一味貼瘡半日許。可再易。血盡根出遂愈。蜚螬心腹下度

取之。其肉稍白是也。所以云食羊肉又大作者。蓋蜚螬食

羊肉故耳。用時便禁食羊肉。其法蓋出葛洪肘後方也。本草

韓光治疔腫人也。正觀初衛州徐使君訪得此方。用艾蒿一

擔燒作灰入竹筒中淋取汁一二合和石灰如麵漿以針

刺瘡中至痛即點之點三遍其根自拔亦大神驗正觀中

用治三十餘人得差故錄之

千金方

白疔瘡全看部位不佳者

甚為難治觀其毒將走之症用針破其四圍插入拔

其惡血此法甚妙

繆仲淳治顧博士伯欽內人左耳患疔時方孕令先以白藥

子末雞子清調塗腹上護胎次以夏枯草甘菊貝母忍冬

地丁之屬大劑飲之一服痛止疔立拔胎亦無恙白藥子

療馬病者

廣筆記

馬銘鞠治顧聖符幼弟患髭疔醫者先用火針圍腫腫脹至

目與鼻俱隱入肉牙關緊急用患者耳垢齒垢刮手指甲